

PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS

PERTANYAAN : LISAN

DARIPADA : TUAN WONG LING BIU [SARIKEI]

TARIKH : 24 NOVEMBER 2020 (SELASA)

SOALAN

TUAN WONG LING BIU [SARIKEI] minta MENTERI KESIHATAN menyatakan sebelum vaksin untuk COVID-19 ditemukan bagaimanakah langkah pihak Kementerian untuk menyembuhkan majoriti pesakit yang dijangkiti penyakit bahaya itu di negara kita.

JAWAPAN

Tuan Yang di-Pertua,

1. Sejak kemunculan pandemik COVID-19, Kementerian Kesihatan Malaysia (KKM) telah **membangunkan protokol rawatan COVID-19 yang dikemaskini** berdasarkan **saranan badan antarabangsa** seperti Pertubuhan Kesihatan Sedunia (*World Health Organization* - WHO), kajian saintifik dan keberkesanan rawatan ke atas pesakit-pesakit di Malaysia dan di luar negara.

2. **Sehingga kini tiada ubat khusus bagi merawat COVID-19.** Protokol rawatan terkini berpandukan tahap klinikal COVID-19, status klinikal pesakit, keputusan ujian makmal dan radiologi serta pelan rawatan pesakit.

3. Pelan rawatan bagi pesakit COVID-19 di Malaysia adalah berdasarkan 5 tahap klinikal iaitu:

Tahap 1 : Tidak bergejala

Tahap 2 : Bergejala tanpa radang paru-paru

- Tahap 3 : Bergejala dengan radang paru-paru
Tahap 4 : Bergejala dengan radang paru-paru dan memerlukan bantuan oksigen
Tahap 5 : Pesakit kritikal dengan penglibatan *multiorgan*

4. Secara amnya, kesemua pesakit COVID-19 akan diberikan **rawatan simptomatik bagi merawat gejala pesakit tersebut seperti contoh pemberian ubat demam serta penjagaan nutrisi yang optimal dan penjagaan sistem peredaran darah yang seimbang.** Pemantauan gejala dan perkembangan pesakit juga dipantau dengan rapi **melalui pemeriksaan darah dan pengimejan mengikut keperluan pesakit.** Pemberian beberapa jenis ubatan yang lebih spesifik adalah berdasarkan tahap klinikal pesakit. Di antara ubatan yang termasuk di dalam protokol rawatan bagi pesakit COVID-19 adalah seperti berikut:

- i. **Rawatan Antiviral, Antibiotik dan *Immuno-modulatory*;**
Ubat Antiviral seperti contoh Favipiravir dan ubat *Immuno-modulatory* seperti contoh Dexamethasone yang berfungsi untuk memperbaiki respons sistem pertahanan tubuh. Ubat Antibiotik diberi jika pesakit disyaki atau disahkan mendapat jangkitan bakteria.
- ii. **Rawatan Profilaksis Ubat Pencair Darah bagi *Venous Thromboembolism*;**
Pesakit di dalam kategori tahap 4 dan 5 berisiko mengalami keadaan darah beku di dalam saluran darah (*Venous Thromboembolism*) yang boleh menyebabkan kematian. Oleh yang demikian, pesakit-pesakit ini diberikan ubat pencair darah seperti *Low Molecular Weight Heparin Enoxaparin* bagi mengelakkan terjadinya komplikasi tersebut.
- iii. **Sokongan Hemodinamik;**
Bertujuan mengekalkan sistem peredaran darah dan mengelak dari terjadinya renjatan akut (*shock*) yang boleh mengancam nyawa. Rawatan cecair atau infusi intravena akan diberikan manakala ubat-ubat *inotrope* diberikan kepada pesakit sekiranya perlu.

SOALAN NO : 12

- iv. Selain daripada rawatan yang telah dinyatakan, pemberian ubatan profilaksis bagi mengelak *stress ulcer* serta mobilisasi pesakit turut diberikan.

Tuan Yang di-Pertua,

5. Protokol ini sentiasa dikemaskini berdasarkan perkembangan terkini dan bukti saintifik dari masa ke semasa. Kementerian Kesihatan Malaysia sentiasa komited dalam memberikan rawatan yang terbaik kepada pesakit COVID-19.

Sekian, terima kasih.